



Aatsitassarsiorfinni radiup qinngorneranik 60 ppm-inik akoqarnerusunik qalluiffiusuni aalajangersimasumik illoqarfinnut, nunaqarfinnut imeqarfinnullu tasernut 50 kilometerinik isumannaallisaanikkut killeqarfiliisoqarnissaanik Naalakkersuisut ataatsimut aalajangersagaliornissamik peqquneqarnissaannik Inatsisartuni aalajangiiffigisassatut siunnersuut. Siunnersuummut atatillugu inatsisiliornikkut suliasat pisariaqartut kingusinnerpaamik UKA2017-imi saqqummiunneqassapput.

(Inatsisartunut ilaasortaq Aqqaluaq B. Egede, Inuit Ataqatigiit)
(Siullermeernera)

Inuit Ataqatigiit suliasaanni pingaarnerpaarpaannorsimagunarpoq qinngornernik ulorianartunik akulinnik aatsitassarsiornermik unitsitsilluinnarnissaq soorlu aatsitassat uranimik akoqarpata. Sualummik partiimut immikkut pingaaruteqarpassippoq Kuannersuarni aatsitassarsiulernissamik unitsitsinissaq.

Inuit Ataqatigiit suliamik unitsitsiniarlutik aporfiusinnaasunik nassaarniallaqqissusaat pillugu kakkanaalaanngitsoorsinnaanngilakka. Partiip innuttaasunik taasititsinissamut kissaataa inimi maani amerlanerussuteqartut itigartereernikuuaat taava aamma maannakkut illoqarfinnut, nunaqarfinnut imeqarfinnullu 50 kilometerinik isumannaallisaanikkut killeqarfiliisoqarnissaanik manna siunnersuut isummerfigisussanngorparput. Siunnersuut akuerineqassappat Kuannersuarni aatsitassarsiornissaq unitsinneqassaaq.

Nunatsinni aatsitassanik naleqarluartunik piiaanissaq Demokraatini isumaqarput naapertorlugu siunissami nunatta aningaasarsiorneranut annertuumik ilaasussaavoq. Sulliviit pilersiororneqassappat, atugartuussuseq, tungiuineq aamma aningaasarsiorneq patajaannerusooq pilersinneqassaaq.

Siunnersuut manna akuerineqassappat nunatsinni aatsitassarsiorneq aallartinisalersooq innarlerneqassaaq. Akuersissagutta allamiut aningaasaliisartut oqarfigissavagut nunatsinnut aningaasaliinatik nunanut allanut aningaasaliisariaqartut maani nunami aalajangiinerit tatigineqarsinnaanngimmata. Inuit Ataqatigiit siunnersuumminni namminneq oqaatigaat, siunnersuut manna akuerineqassappat nunatut GME-mut annertuumik taarsiissuteqartariaqassasugut, siunnersuut manna akuerineqartuugaluarpat. Peqataanilli eqqaamassavarput, aningaasaleerusussuseqarsinnaasut nakkutigissammassuk inatsisiliortutut untritilinnik milliunilikkaanik aningaasaliiffigineqareersoq suliaq unitseriataarsinnaaneripput. Taamaassappat iliuuserput nunat allamiut aningaasaleerusussuseqarnerannut annertuumik innarliisussaavoq.

Tamannaannarluunniit tunngavigalugu soorunami siunnersuut manna akuerisinnaanngilarput.



Pingaaruteqarput nunatut aningaasaliiffissatut pilerinartuunissarput aamma pingaaruteqarpoq politikikkut allanngorartuunngitsutut nunarsuarmioqatitsinnit isigineqarnissarput, tassani aalajangikkagut tatigineqarsinnaallutik.

Demokraatini tamatuma saniatigut iluarisimaarparput inimi maani isumaqatigiissutigigatsigu aatsitassarsiornermi nunarsuarmi sillimanissamut piunasaqaatit qaffasinnerpaartaat malinneqassasut aamma taamaallaat piiaanissamut akuersisummik tunniussisassasugut VVM-imut misissuinerit pitsaasut tunniunneqarsimappata (avatangiisinut sunniutit pillugit misissuinerit)

Taamatut oqaaseqarluta siunnersuut itigartipparput.